

**Aqqiissutissat siunnersuut**

Siunnersuut 27. januar 2015-imeersoq taarserpaa

(Siunnersuummi immikkoortortap sisamassaani allannguinentaqarpoq, tassanilu erseqqissarneqarluni taamaallaat inatsisinik allannguutissatut siunnersuut § 3-ertaani Kalaallit Nunaanut attuumassuteqartoq, taamaattumillu Aningaasanoorutit ilai pillugit Kalaallit Nunaannut inatsisip allannguutissatut siunnersuutaani aalajangersakkat taamaallaat nutserneqarmata.)

Inatsisartut suleriaasianni § 33 naapertorlugu aalajangiiffigisassatut siunnersuut ataani pineqartoq matumuuna Naalakkersuisunit saqqummiunneqarpoq:

**Aningaasanoorutit ilai pillugit Kalaallit Nunaannut inatsisip allannguutissaatut akuerineqarnissaa pillugu Inatsisartut aalajangiiffigisassaattut siunnersuut**

(Aningaasaqarnermut Aatsitassanullu Naalakkersuisoq)

**Siullermeerneqarnera****Tungavilersuut**

Aningaasanoorutit ilai pillugit Kalaallit Nunaannut inatsit (inatsit nr 223, 22 marts 2011-imeersoq) qulakkeerivoq, Kalaallit Nunaanni Aningaasanoorutitik tuniniaanermut tunngatillugu malittarisassat aqqiissugaammata, Danmarkimi aningaasanoorutitut inatsimmut ataqatigiissaagaallutik. Aningaasanoorutit ilai pillugit Kalaallit Nunaannut inatsisikkut ilaatigut eqquniaasitsineq, qarasaasiatigut aningaasanoortarneq, taassuma ilagalugu eqquniaanernik tuniniaasarnernik aamma qarasaasiatigut aningaasanoortitsisarnernik ilaatigut ammanerulersitsineq naleqqussarneqarmat. Tamatuma saniatigut Aningaasanoorutit ilai pillugit Kalaallit Nunaannut inatsit 2010-mili Kalaallit Nunaat Danske Spil A/S-ip iluanaarutaanit pissarsisarunnaarmalli, danskit naalagaaffiata Kalaallit Nunaanni Namminersorlutik Oqartussanut ukiumoortumik aningaasanik taartisiassanik nuussisarnissaanik qulakkeerivoq.

Danskit akileraartarnermut ministereqarfiat massakkut danskit aningaasanoorutitut tunngatillugu malittarisassaannut allannguutissanik piareersaateqarpoq. Tassunga atatillugu akileraartarnermut ministereqarfiup siunnersuutigaa, Aningaasanoorutit ilai pillugit Kalaallit Nunaannut inatsimmut attuumassutillit ilutigigitillugit allannguuteqartinneqassasut, taamaasilluni nunat taakku marluk akornanni inatsisitigut inissisimaneq naleqqussagaalluni ataqatigiissinneqarnera pigiinnarneqassasoq.

Taamaammat Naalakkersuisut inassutigaat, Inatsisartut akuersaassagaat Naalakkersuisut Naalagaaffeqatigiit nalunaarfigissagaat, Aningaasanoorutit ilai pillugit Kalaallit Nunaannut inatsisip allannguutissaatut siunnersuut pigineqartoq kingusinnerusukkut inatsisitigut allannguutaasinnaasut ilanngullugit Kalaallit Nunaannit akuerineqarsinnaasooq.

Danskit inatsisissatut siunnersuutaannut missingersuusiap §-iisa pingajuat kisimi Kalaallit Nunaannut attuumassuteqarmat taanna kisimi kalaallisut nutserneqarpoq.

Aningaasanoorutit ilai pillugit Kalaallit Nunaannut inatsit ukunani pineqartuni allanngortinneqassasooq eqqarsaatigineqarpoq, takujuk danskit akileraartarnermut ministereqarfiata nassiusaani inatsisissatut siunnersuummut missingersuusiap §-iisa pingajuat:

- Danskit akileraartarnermut ministeriat aningaasanoortarnermut tunngasutigut aamma pisinnaatinneqarpoq akuersissuteqarnermut nalunaaqutsersuisarnermullu aaqqiissutit, piffissalikkamik nalunaarusiat, pinerlunnikkut aningaasarsianik malunnarunnaarsaasarneq il.il. pillugit nalunaarutitigut malittarisassanik aalajangersaasinnaasooq.
- Aningaasanoortarfinni siulittaasunut akuerineqarsimanngitsunut pineqaatissiisarneq eqqunneqassaaq.
- Pinaveersaartitsinermit aamma pinerlunnikkut aningaasarsianik malunnarunnaarsaasarneq taama malittariillutik qunusiarinninnikkut anguniagaqarneq pillugit aalajangersakkanik unioqqutitsinernut allaffissornikkut pineqaatissiisarneq eqqunneqassaaq.
- Danske Spil A/S-imit hiistinik qimminillu eqquniaasitsilluni tuniniaanerit Danmarkimi eqquniaasitsinertullu assinganik akileraaruserneqartassapput.
- Aningaasanoorutitut ammanerulersinneqartunut inatsisitigut akileraarusiisarnermut piffissaritinneqartoq sapaatip akunneraniit qaammammut allanngortinneqassaaq.
- Maalaarutip sannaq naleqqussarneqassaaq.
- Kiisalu kukkunerisiuinikkut erseqqissaanikkullu allannguutissamerngit siunnersuutigineqarput.

Aningaasanoorutitut ammanerulersinneqartunut akileraarusiisarnermut piffissaritinneqartup sapaatip akunneraniit qaammammut allanngortinneqarnissaanik kissaateqarnermut tunngavigineqartoq tassaavoq, akileraarusiisarnermut piffissaritinneqartoq (sapaatip akunnera) naaqisoq aningaasanoorutit tuniniaasartunut allaffissornikkut artukkiisarmat

aammalu tamatuma kingunerisarlugu, aningaasanoorutinik tuniniaasartut piffissap ilaatigut (akileraarutitigut ilanngaattissat ilanngaatigereerlugit) iluanaaruteqarneq ajormata.

Aningaasanoorutit ilai pillugit Kalaallit Nunaannut inatsisip allannguutai qulaani taaneqartoq malillugu danskit naalagaaffiata Kalaallit Nunaanni Namminersorlutik Oqartussanut ukiumoortumik aningaasanik taartisiassanik nuussisarnissaanut sunniteqassanngillat.

Aningaasanoorutit ilai pillugit Kalaallit Nunaannut inatsisip allannguutissaatut siunnersuummik akuersinermi kalaallit inatsisaannik allanngortitsinissaq pisariaqartinneqanngilaq.

**Aningaasaqarnikkut allaffissornikkullu pisortanut kingunerisassat**

Siunnersuut pisortanut aningaasartuuteqarnerunermik imaluunniit allaffissornikkut ajortumik kinguneqartitsissasoq naatsorsuutigineqanngilaq.

**Aningaasaqarnikkut allaffissornikkullu namminerisamik inuussutissarsiutilinnut kingunerisassat**

Siunnersuut namminerisamik inuussutissarsiutilinnut aningaasartuuteqarnerunermik imaluunniit allaffissornikkut ajortumik kinguneqartitsissasoq naatsorsuutigineqanngilaq.

**Innuttaasunut aningaasaqarnikkut allaffissornikkullu kingunerisassat**

Siunnersuut innuttaasunut aningaasartuuteqarnerunermik imaluunniit allaffissornikkut ajortumik kinguneqartitsissasoq naatsorsuutigineqanngilaq.

**Ilanngussat**

Aningaasanoorutit ilai pillugit Kalaallit Nunaannut inatsisip allannguutissaatut siunnersuummut missingiut.